

26/07/1997

Garis panduan majukan pertanian

KEMENTERIAN Pertanian akan mengadakan pertemuan dengan semua pihak terbabit dengan bidang pertanian untuk menggubal satu garis panduan baru ke arah memodenkan pembangunan sektor itu membabitkan petani, nelayan dan penternak.

Perbincangan dua hala dalam pertemuan itu bagi mencari hala cara baru bagi memajukan sektor pertanian negara, menjelang abad ke-21.

Timbalan Menteri Pertanian, Datuk Dr Tengku Mahmud Mansor, berkata langkah itu adalah antara daya usaha kementerian meningkatkan semangat petani, penternak dan nelayan bagi membantu memajukan sektor pertanian.

Menurutnya, petani, penternak dan nelayan adalah tenaga penggerak penting pembangunan sektor pertanian negara yang perlu diberi kefahaman menyeluruh mengenai kepentingan sektor pertanian .

Katanya, kementerian akan mengadakan perjumpaan dengan semua pihak terbabit untuk berbincang dan memikirkan hala cara lebih baik bagi memodenkan sektor pertanian negara.

"Kementerian akan memperbanyakkan sesi memperkukuh pandangan minda pemimpin PPK yang menjadi badan penting kepada peladang agar melihat secara positif bidang pertanian komersil.

"Sesi percambahan fikiran adalah penting untuk membolehkan kerajaan mengenal pasti masalah atau halangan yang mungkin wujud di peringkat akar umbi," katanya di Ketereh, Kelantan kelmarin.

Sebelum ini, Perdana Menteri, Datuk Seri Dr Mahathir Mohamad berkata, kerajaan akan memperkenalkan pendekatan baru dalam setor pertanian dan Industri Kecil dan Sederhana (IKS) bagi meningkatkan kecekapannya.

(END)